

Majourau Canoungé GEORGE

Istòri de Clouchié

QUÀUQUI MOT D'INTRADO

Estènt que Diéu me prèsto vido e que, bono-di sa bounta, pode encaro expandi quicon de bèn, veici, après tant de trobo en vers, un recuei de nouvello, de record, de conte, d'istòri en prosò que se soun debana à l'entour de nòsti clouchié.

En li legissènt, poudrés vous faire uno idèio de ço qu'èro la vido dins nosto Prouvènço, avans li gràndi guerro de 1914 e de 1939, avans lou Councilè de Vatican II e la bourroulo que l'a segui.

S'avèn forço escri, avèn pas tout desvela, e gardan encaro pas mau de causo que se n'en tirarié uno mouralo benfasènto; mai i'a de gènt interessa dins li conte que vivon encaro e que pourrien n'èstre mau-countènt:

— Touto verita es pas sèmpre bono à desvela!

Aproufichas, adounc, de ço qu'avèn decida de publica e, bèn que lou tèms de legi siegue devengu rare e precious, regretarés pas li risoulet, li leiçoun, li pensamen que n'aurés agu la favour e la gràci.

Que Diéu benesigue lis obro de l'autour e si bèn-voulènt legèire.

Felibre de l'Autar

10 de mai 1971

À GUIISO DE PREFÀCI

Aquélis “Istòri de clouchié“ que lou canoungé Enri George, Felibre majourau, nous presènto vuei, après uno longo tiero de recuei de pouèmo, de pastouralo e d'obro en prosò (d'ùni en francés) tóuti di mai requist, noun soun de barjadisso, mai bèn de souvenènço viscudo, esmouvènto vo amusanto, que mancaran pas d'encanta lou leitour.

Escri dins uno lengo granado, que i'es naturalo e d'un biais famihié que n'en rènd l'entime resson, cadun di raconte es coume un got de Cristau escrinçela ounte l'on pòu

s'abéura d'uno aigo puro, fresco e lindo, talo li sentimen crestian e uman que l'autour espremis dins la mouralo que n'en tiro.

E, dins lou tèms que sian, ounte la vioulènci e l'eroutisme, auboura à l'aussado d'un culte, soun causo courrènto dins li libre e aiours, es urous de pousqué èstre atriva pèr uno leituro ounèsto e que pamens la bono sau ié defauto pas.

Lou countaire saup au besoun “castiga li mour en risènt“, mai coume noun, eici, s'agis de cascadeleto mai bèn d'istòri vertadiero, l'autour qu'es davans tout un pouèto, souvènti-fes nous li raporto au fiéu de sis impressioun de pouèto. E acò es un plasé escrèt qu'apound à nosto leituro. Pèr cita qu'un eisèmples d'aquelo pouèsio, levarai un pichot escapouloun de “Li Pasco en granjo“.

— La Naturo, en aquest moumen, se reviéudavo, adeja s'èro enmantelado d'erbo e de fueio novo, nevavo souto lis amelié, li cereisié, li pesseguié... anavian contra li lèio d'aubrespin e de coudounié ounte perlejavo encaro e lusissié l'eigagno dóu matin.., me semblavo que lis aucèu disien de cantico, que li bestiolo dins l'erbo devien jougne si patouno, que li floureto se clinavon e qu'èron ravidò de s'atrouba sus lou passage dóu Segneur....

Es pas necit que vague plus luen. Vautre, legèire, aurés que de vira fuiet e, seguramen, pajo à-cha-uno, atroubarés tout ço que poudès espera de bon e de bèu d'aquéu nouvèu libre que nous semound lou canounge George qu'aman e qu'amiran.

Jan GAVOT.